



MENTERI SUMBER MANUSIA

KENYATAAN MEDIA

RUU KESATUAN SEKERJA (PINDAAN) 2023 DILULUSKAN DI DEWAN NEGARA

Rang Undang-Undang Kesatuan Sekerja (Pindaan) 2023 telah diluluskan pada **28 November 2023** di Dewan Negara. Rang Undang-Undang ini digubal bagi memenuhi obligasi Kerajaan Malaysia terhadap Perjanjian Komprehensif dan Progresif bagi Perkongsian Trans-Pasifik (CPTPP) yang mengkehendaki setiap negara anggota menambah baik undang-undang perburuhan termasuk Akta Kesatuan Sekerja 1959 selaras dengan standard perburuhan antarabangsa sebagaimana yang digariskan di bawah Deklarasi Pertubuhan Buruh Antarabangsa (ILO) 1998. Selain itu, pindaan ini juga merupakan antara usaha kerajaan dalam merealisasikan Pelan Pelaksanaan Dasar RMKe-12 untuk melaksanakan inisiatif bagi meningkatkan keahlian dalam kesatuan sekerja ke arah pengukuhan sistem yang menyokong pasaran buruh dan meningkatkan pampasan pekerja.

Rang Undang-Undang Kesatuan Sekerja (Pindaan) 2023 ini telah dibentangkan dan diluluskan di Dewan Rakyat pada 10 Oktober 2023. **Cadangan pindaan di bawah Rang Undang-Undang ini melibatkan 36 fasal yang merangkumi 30 fasal pindaan, 5 fasal baharu dan 1 fasal yang dimansuhkan.**

Rang Undang-Undang ini bertujuan untuk meminda Akta 262 dengan objektif utama bagi meniadakan sekatan ke atas pembentukan kesatuan sekerja berdasarkan penubuhan tertentu atau persamaan dalam tred, pekerjaan atau industri, dan membenarkan kepelbagaian kesatuan sekerja (*multiplicity of trade unions*) dalam

mana-mana penubuhan, tred, pekerjaan atau industri. Ini adalah selaras dengan prinsip kebebasan berpersatuan di mana pekerja dan majikan adalah bebas untuk menubuhkan atau menyertai mana-mana kesatuan sekerja pilihan mereka sendiri selaras dengan prinsip-prinsip utama dalam Konvensyen ILO No. 87 (*Freedom of Association and Protection of the Right to Organise*).

Kementerian Sumber Manusia berharap kelulusan Rang Undang-Undang ini akan meningkatkan imej negara di peringkat antarabangsa khususnya dalam kebebasan berpersatuan dan seterusnya menggalakkan penubuhan serta meningkatkan keahlian kesatuan sekerja di negara ini. Dengan ini, ia akan **menambah baik perlindungan dan kebajikan serta produktiviti golongan pekerja dan majikan** melalui mekanisme tawar menawar dalam perundingan kolektif (*collective bargaining*) antara kedua-dua pihak selain memantapkan sistem pengurusan perburuhan negara.

YB TUAN V. SIVAKUMAR
MENTERI SUMBER MANUSIA
PUTRAJAYA
30 NOVEMBER 2023